

乾

象

通

鑑

乾象通鑑卷第四

河間府免解進士臣李季奉

聖旨編

陽微後論

日蝕總序

日蝕初起

日蝕既

日蝕京師見四方不見

正旦日蝕

日蝕有祲氣

救日蝕

日四時蝕

日蝕十干

日蝕十二辰

日蝕十二月

日出至日入有蝕

日蝕有雜狀

六十軍子日蝕

日蝕有二十四改

日蝕總序

天文總論曰日蝕者相奄之謂也日行遲一日行一度一年一周天月行疾一日行十三度度之三一月一周天及日之時與日同道而行在於內映日故日蝕其象大臣與君同道逼迫其主而奄其明之義若無道之邦日月過即蝕兵之攻伐其下喪亂人君當防慎權臣內戚左右擅威者故曰日者至陽之精君象也

天官書曰日變脩德之理素服齋戒是故禹湯罪已其興也勃焉日蝕占在君事驗或在臣后者斬蓋君能脩德移咎在臣后也應驗或占於分野或占於日辰也

經曰日蝕者皆在朔及晦若非晦朔而蝕者名曰薄一曰日若黃赤無光亦謂之薄日薄者皆人君誅罰不以理姦臣漸欲謀兵而起此爲陰氣盛奄日光陰侵陽臣陵君之象主其下國憂近期一年遠期三年大體薄與蝕皆是人君失德亡國之兆日蝕皆從西缺月蝕皆從東缺若中央有虧名曰黑子

不爲蝕也

夫言蝕者似蟲食葉之形狀也

易萌氣樞曰聰明蔽塞政在臣下親戚于朝君不覺  
悟則日蝕爲咎也

董仲舒曰日蝕者陰氣盛滯漸奪君明治道有失臣  
專國政則上德不宣下民常怨當折寵倖之勢減  
冗食之人無忽諫言任於賢者則災害不生

京房對災異曰人君驕佚專明爲陰所侵則有日蝕  
之變不救必有篡弑之萌

司馬彪曰君無道有虧所乘故曰蝕日蝕者陽不尅  
也人君政修德其事則咎害除

河圖稽曜鈞曰日蝕者陽微陰盛君蔽臣恣

井德曰日蝕者其下亡國

詩緯推度曰日蝕者其下君傷

春秋傳曰日蝕則書之蓋下陵上臣侵君象

夏氏占曰日蝕而出軍者軍傷將亡後有疾病

曆家之說謂日光以望時遙奪月光故月蝕日月周

會月奄日故日蝕蝕有上下者行有高下日光輪

存而中蝕者相奄密故日光溢出皆既者正相當

而相奄也然聖人不言月蝕日而此言日蝕爲文

關於所不見也

河圖遺書曰日蝕者陰盛陽衰主弱臣彊之象亦陽  
不尅陰也不救則人臣擅主柄內戚擅權臣不受  
制于人君亦曰有自立諸侯

陳卓叙占曰日蝕者陰侵陽臣逼君也不救則人君  
失位國祚將亡

左傳昭公三十年趙簡子夢童子羸而轉以歌且占  
諸史墨曰吾夢如是今而日食何也對曰六年及  
此月也吳其入郢乎終亦弗克入郢必以庚辰日  
月在辰尾庚午之日始有譎火勝金故弗克

日蝕初起

甘德曰日蝕從上者失於道君當之日蝕從旁者失於令相當之日蝕從下者失於事將當之

却萌曰日蝕從上者皆爲責在君其色青則弱於任善下生怨惡其色赤則君無禮不好學色黃則君欺其下奄臣之美色白則弱於誅罰下生仇讎色黑則君簡宗廟鬼神失享曰蝕從中者內有伏謀色青則謀者止色赤則其事成色黃則謀者誅色白則其事覺色黑則逆謀成日蝕從下者皆爲責在民色青則民相譖後有疾疫蟲蝗色赤則彊陵弱後有大旱色黃則民失其居後有土功色白則



相殘害後有小兵色黑則小民多怨後有水災

漢書曰日蝕從上者失君日蝕從旁者失臣日蝕從下者失民

河圖遺書曰日蝕從上及三分已上者人君有憂及七分已上者人君受制于諸侯及九分已上者其國將亡不祀日蝕從旁及三分已上者君失臣及五分已上者臣不臣及九分已上者人臣將有叛謀及篡弒之禍日蝕從下及三分已上者君失民及五分已上者民多怨上及九分已上者民有叛謀將弒其君

日蝕既

董仲舒曰前事將大後事又大者則日蝕既

京房易祲占曰日蝕既者其下臣欲弑主夷兵起一  
曰霸者興

甘德曰日蝕既則大人憂又曰日蝕不盡者其下失地  
感精符曰日蝕既則破陰謀黜邪佞備邊鄙嚴號令  
則其下災止

河圖遺書曰日蝕不救則王者有憂國祚將失亦曰  
有自立人臣

京房外傳曰日蝕既則人臣有匿謀將逼君篡弑之

象又曰有叛諸侯

晉穆帝升平四年八月辛巳朔日有蝕之既在角凡蝕淺者禍淺蝕深者禍深角爲天門人主惡之明年帝崩

日蝕京師見四方不見

四方見京師不見附

海上通占曰凡日蝕四方見京師不見則殃在臣下京師見四方不見王者惡之亦各以其舍命國

漢成帝永始元年九月丁巳晦日有蝕之京房易傳曰元年九月日蝕酒亡節之所致也獨使京師知之四方不見者天戒若曰沉湎于酒君臣不別禍

在內也

漢成帝永始二年二月乙酉日有蝕之谷永以京房  
易占對曰今年二月日蝕賦歛不得度民愁怨所  
致也所以使四方皆見京師不見陰蔽也天戒若  
曰人君好治宮室大營墳塋賦歛滋重百姓匱竭  
禍在外也

正旦日蝕

天文志曰正旦日蝕王者惡之亦曰天子有兵喪之憂  
陳卓叙占曰正旦日蝕則王者當之其國將棄祀亦  
主亂兵入宮天子下殿

河圖遺書曰正旦爲歲首日蝕則人君失位國祚將亡  
漢惠帝七年正月辛酉朔日有蝕之是謂正朔王者  
惡之秋八月帝崩于未央宮太后哭而淚不下侍  
中張辟彊謂陳平曰太后泣不下淚者畏君將危  
呂氏宜請呂產呂祿監軍爲將監南北軍事太后  
必喜君等免禍平從太后果喜而泣之下淚

漢安帝永初五年正月庚辰朔日有食之本志以爲  
正旦王者聽朝之日也是謂太后攝政天子守虛  
位不得行其號令蓋陽不克示象

魏高貴鄉公甘露五年正月乙酉朔日有蝕之京房

易占曰日蝕乙酉君弱臣彊至其年五月司馬將  
兵反征其主後有成濟之變

晉安帝元熙元年正月戊子朔日有蝕之後王室微  
弱天下兵亂

日蝕有祲氣

甘德曰日蝕有氣如虹在日上者有逆臣虹上有氣  
如暈鳥夾曰者暈音揮名曰天雞守日者主后妃有  
謀有氣如白兔守日者民叛謀舉兵威

京房易祲占曰日以甲乙日有二珥四珥而蝕者有  
白雲中出天下有兵日以丙丁日有二珥四珥而

蝕者有黑雲中出天下疾疫日以戊己日有二珥  
四珥而蝕者青雲中出人主有兵喪日以庚辛日  
有二珥四珥而蝕者有赤雲中出天下有繫主日  
以壬癸日有二珥四珥而蝕者有黃雲中出有土  
功事

救日蝕

河圖帝覽嬉曰日蝕應歷則不占不應歷則占禮記  
曰男教不修陽事不得謫見于天日爲之蝕古者  
日蝕則天子素服而修六官之職皆所以懼天戒  
而自省惕也

周禮地官司徒曰敕日蝕則詔王鼓鄭司農曰日蝕王親擊鼓也

春秋曰日蝕鼓用牲于社

左氏傳曰用幣于社伐鼓于朝

魯昭公十七年日有蝕之祝史請所用幣叔孫昭子

曰日有蝕之天子不舉伐鼓于社諸侯用幣于社

伐鼓于朝禮也

感精符曰日蝕則鼓用牲于社言陰之未滋鳴鼓以

脅之也

公羊傳曰日有蝕之鼓用牲于社求陰之道也以朱

絲繫社或曰脅之或曰爲闇恐人犯之故繫之也



何休曰脅之與責同義社者土地之主也月者土地之精也上擊乎天而犯日故鳴鼓而攻之脅其本也朱絲縈之助陽抑陰也或曰爲闇者社者土地之主尊也爲日先盡天闇冥恐人犯歷之故縈之然此說非也先言鼓後言用牲者明先以尊者命責之後以臣之禮接之所以爲順也

白虎通曰日蝕必救之陰侵陽也鼓攻之以陽責陰也故春秋日蝕鼓用牲于社所以必用牲者土地別神也尊之不敢虛責也日蝕大水則鼓用牲大旱則雲祭求雨非言虛也助陽責下求陰之道也

決疑要曰凡枚日蝕皆着赤幘以助陽也日將蝕天子素服避正殿內外嚴日有變伐鼓聞音侍臣著赤幘帶劔入侍三臺令史已下皆持劔立其戶前衛尉卿驅馳繞宮察巡守備周而復始日復常乃皆罷之

禮斗威儀曰枚日變執事者冠長冠衣阜單衣絳領神祿中衣絳袴絺以行禮如故事

日四時蝕

甘德曰日春蝕有女喪日夏蝕諸侯死日秋蝕有兵日冬蝕相死

武密曰春庚辛夏壬癸秋丙丁冬戊己日有蝕者皆爲下謀其上

日蝕十干

天官書曰蝕爲不藏也日蝕甲乙四海之外不占晉灼日海外遠甲乙日時不以占準丙丁江淮海岱也戊己中州河濟也庚辛華山以西壬癸恒山以北日蝕者其下君必當之

日蝕十二辰

感精符曰日蝕寅卯辰木域招謀者司徒也日蝕巳午未火域招謀者太子也日蝕申酉戌金域招謀

者司馬也日蝕亥子丑水域招謀者司空也

日蝕十二月

京房易傳曰正月日蝕者大臣死或有黜者二月日蝕者夫人死或旱三月日蝕者其宿分有叛者四月日蝕者大臣有憂五月日蝕者謀侯死六月日蝕者人主有謀其下國分土七月日蝕者大水敗城郭八月日蝕者天下更始期三年九月日蝕者有外主自立不成十月日蝕者姦臣在朝十一月日蝕者其下亡地十二月日蝕者天下有兵

武密曰正月日蝕民多病二月日蝕多喪三月日蝕

大水四月日蝕多疾疫五月日蝕大旱六月日蝕  
大臣死七月日蝕歲惡八月日蝕兵起九月日蝕  
女功貴十月日蝕六畜貴十一月日蝕糴貴牛死  
十二月日蝕牛死水災麥不熟

日出至日入有蝕

武密曰日出至食時有蝕者宋鄭國當之食時至禺  
中有蝕者楚國當之禺中至日昃有蝕者秦國當  
之日昃至晡時日蝕者魏國當之晡時至日入有  
蝕者燕國當之日入至人定有蝕者代國當之背  
不出三年其下當有大喪

日蝕有雜狀

武密曰日蝕有大風四方有雲者宰相專權欲謀叛  
日蝕地動色昧而寒者公侯專恣日蝕大寒夷兵  
動日蝕有暈珥者后妃有謀日蝕四邊有黑氣者  
臣不盡忠

日蝕六十甲子

潛潭巳曰甲子日蝕者有狄兵起乙丑日蝕者大旱  
丙寅日蝕者有蟲蝗丁卯日蝕者主旱有兵戊辰  
日蝕者地震陰盛己巳日蝕者有火災庚午日蝕  
者憂火有兵辛未日蝕者有水潦壬申日蝕者諸

侯相攻癸酉日蝕者連陰不解靈雨數降甲戌日  
蝕者草木滋乙亥日蝕者陽不明冬無冰丙子日  
蝕者夏大霜丁丑日蝕者三公有憂戊寅日蝕者  
天下大風己卯日蝕者多盜賊庚辰日蝕者有兵  
寇辛巳日蝕者妃后有謀壬午日蝕者有久雨癸  
未日蝕者仁義不明甲申日蝕者四月大霜乙酉  
日蝕者宮人退丙戌日蝕者多冤訟丁亥日蝕者  
有匿謀戊子日蝕者宮室有憂己丑日蝕者下民  
憂庚寅日蝕者將相黜或死辛卯日蝕者臣自伐  
壬辰日蝕者河決連陰癸巳日蝕者權不行甲午

日蝕者蟲螟爲害乙未日蝕者天下邪氣盛丙申  
日蝕者諸侯叛丁酉日蝕者侯王侵戊戌日蝕者  
后妃憂己亥日蝕者小人用事庚子日蝕者君有  
疑辛丑日蝕者三公死壬寅日蝕者大臣驕橫癸  
卯日蝕者外國代主甲辰日蝕者雨水大乙巳日  
蝕者東國發兵丙午日蝕者民多流亡丁未日蝕  
者王者憂戊申日蝕者地動搖狄侵兵彊己酉日  
蝕者有相疑庚戌日蝕者臣下相侵辛亥日蝕者  
臣子有憂壬子日蝕者女主憂癸丑日蝕者水滂  
爲敗甲寅日蝕者親戚相叛乙卯日蝕者雷不行



霜不殺草丙辰日蝕者山水潦丁巳日蝕者其下有聚兵戊午日蝕者久旱穀傷己未日蝕者其下失土庚申日蝕者夷狄內侵辛酉日蝕者姦邪欲起壬戌日蝕者羣小萌癸亥日蝕者王者憂

日蝕有二十四改

京房易傳曰亡師茲謂不御厥異日蝕其蝕也既並蝕不一處誅衆失理茲謂生叛厥蝕既光散縱畔茲謂不明厥蝕先大雨三日雨除而寒寒即蝕專祿不封茲謂不安厥蝕既先日出而黑光反外燭

韋昭曰日中無光君臣不通茲謂亡厥蝕三既同四邊有明白外燭

姓上侵茲謂誣君厥蝕四方有雲中央無雲其日  
大寒公欲弱主位茲謂不知厥蝕中白青四方赤  
已蝕地震諸侯相侵茲謂不承厥蝕三毀三復君  
疾善下謀上茲謂亂厥蝕既先雨雹殺走獸弑君  
獲位茲謂逆厥蝕既先風雨折木日赤內臣外嚮  
茲謂背厥蝕且雨地中鳴韋昭曰地中有聲如  
鳴耳或白如狗子聲豕  
宰專政茲謂因厥蝕先大風蝕時日居雲中四方  
亡雲伯正越職茲謂分威顏思古曰伯讀曰霸  
正者長史之稱也厥

蝕日中分諸侯爭美於上茲謂泰厥蝕日盡月蝕

半天營而鳴蝕月蝕月半謂蝕望也日蝕月蝕月之半也賦不得茲謂竭

厥蝕星隨而下受命之臣專征之試厥蝕雖侵光

猶光明

顏師古曰試用也自擅意也

若文王臣獨誅紂矣小人

順受命者征其君爲殺厥蝕五色至大寒隕霜

顏師

古曰殺亦讀曰殺

若紂臣順武王而誅紂矣諸侯更始茲

謂叛厥蝕三復三蝕已而風地動適讓庶茲謂

生欲厥蝕日失位光掩掩月形見酒亡節茲謂荒

厥蝕乍青乍黑乍赤明日大雨發霧而寒凡蝕二

十占其形二十有四改之輒除不改三年三年不

改六年六年不改九年

乾象通鑑卷第五

河間府免解進士臣李季奉

聖旨編

歷代事證論

日蝕歷代應驗

日蝕歷代臣僚上書

日蝕應驗

隱公三年日有蝕之蝕貫中央上下竟而黑臣殺從  
中成之形也後衛州吁弑君而立

桓公三年七月壬辰朔日有食之既董仲舒劉向以  
爲前事已大後事將至者又大則既先是魯宋弑

宋亂易許由亡事天子之心楚僭稱王

後鄭咄王師射栢公又二君相篡

類師古曰謂屬公奔蔡而昭公

入高渠彌殺昭公而立子盥

劉歆以爲六月趙與晉分

晉灼曰周之六

月今四月始去畢而入參晉分也畢趙分也曰行去趙速入晉分多故曰與二十八宿分其次度其

月及所屬下皆以爲例

先是晉曲沃伯緝晉侯

類師古曰魯惠公三

十年大夫潘公殺昭侯而納成師不克晉人立孝侯惠之四十五年成師之子曲沃莊伯代翼殺孝

侯是歲晉大亂滅其宗國京房易傳以爲栢三年

日蝕貫中央上下竟而黃臣弑而不卒之形也後

楚嚴稱王兼地千里

栢公十七年十月朔日有蝕之穀梁傳曰言朔不言

日蝕二日也劉向以爲是時衛侯朔有罪出奔齊  
天子更立衛君朔籍助五國舉兵伐之而自立王  
命遂壞魯夫人淫佚於齊卒殺桓公董仲舒以爲  
言朔不言日惡魯桓公且有夫人之禍將不終日  
也劉歆以爲楚鄭分

莊公十八年三月日有蝕之穀梁傳曰不言日不言

朔夜蝕史記推朔在夜明旦日食而出出而解

孟康

日夜蝕地  
中出而止

是謂夜蝕劉向以爲夜蝕者陰因日明

之衰而奪其光象天子不明齊桓將奪其威專會

諸侯而行伯道其後遂九合諸侯天子使世子會

之此其效也公羊傳

璧魯象也後公子慶父叔牙果通於夫人以劫公  
劉歆以爲晦魯衛公

莊公二十五年六月辛未朔日有蝕之董仲舒以爲  
宿在畢主邊兵夷狄象也後狄滅邢衛劉歆以爲  
五月二日魯趙分

莊公二十六年十二月癸亥朔日有蝕之董仲舒以  
爲宿在心心爲明堂文武之道廢中國不絕若綫  
之象也

綫縷也

劉向以爲時戎侵曹魯夫人淫於慶

父叔牙將以弑君故比年再蝕以見戒劉歆以爲

十一月二日楚鄭分

莊公三十年九月庚午朔日有蝕之董仲舒劉向以爲後魯二君弑夫人謀兩弟死狄滅邢徐取舒晉殺世子楚滅弦

名國

劉歆以爲八月秦周分

僖公五年九月戊申朔日有蝕之董仲舒劉向以爲

先是齊桓行伯江黃自至

伯音霜江黃二國名

南服彊楚其

後不納自正而外執陳則陳楚不討鄭伯逃盟諸侯將不從桓政故天見戒其後晉滅虢楚圍許諸侯伐鄭晉弑二君狄滅溫楚伐黃桓不能救劉歆以爲七月秦晉分



僖公十二年三月庚午朔日有蝕之董仲舒劉向以爲是時楚滅黃狄侵衛鄭宮滅杞劉歆以爲三月齊衛分

僖公十五年五月日有蝕之劉向以爲象晉文公將行伯道後遂伐衛執曹伯敗楚城濮再會諸侯召天王而朝之此其效也日蝕者臣之惡也夜蝕者掩其罪也以爲上亡明王栢文能行伯道攘夷狄安中國雖不正猶可蓋春秋實與之文不與之義也董仲舒以爲後秦獲晉侯齊滅項楚敗徐于婁林劉歆以爲二月朔齊越分

文公元年二月癸亥日有蝕之董仲舒劉向以爲先是大夫始執國政公子遂如京師後楚世子商臣弑父齊公子商人弑君皆自立宋子哀出奔晉滅江楚滅六國大夫公孫敖叔彭生並專會盟劉歆以爲正月朔燕趙分

文公十五年六月辛丑朔日有蝕之董仲舒劉向以爲後宋齊莒魯鄭八年之間五君殺死楚滅舒蓼劉歆以爲四月二日魯衛分

宣公八年七月甲子日有蝕之既董仲舒劉向以爲先是楚商臣弑父而立至于莊王遂彊諸夏大國

唯有齊晉齊晉新有篡弑之禍內皆未安故楚乘  
弱橫行八年之間六侵伐而一滅國伐陸渾戎觀  
兵周室後又入鄭鄭伯肉袒謝罪北敗晉師于邲  
流血色水圍宋九月折骸而炊之劉歆以爲十月  
二日楚鄭分

宣公十年四月丙辰日有蝕之董仲舒劉向以爲後  
陳夏徵舒弑其君楚滅蕭晉滅二國王扎子弑召  
伯毛伯劉歆以爲二月魯衛分

宣公十七年六月癸卯日有蝕之董仲舒劉向以爲  
後邾支解鄆子晉敗王師于貿戎敗齊于鞏劉歆

以爲三月晦朧魯衛分

成公十六年六月丙寅朔日有蝕之董仲舒劉向以爲後晉敗楚鄭于鄢陵執魯侯劉歆以爲四月二日魯衛分

成公十七年十二月丁巳朔日有蝕之董仲舒劉向以爲後楚滅舒庸晉弑其君宋魚石因楚奪其君邑莒滅鄆齊滅萊鄭伯弑死劉歆以爲九月周楚分襄公十四年二月乙未朔日有蝕之董仲舒劉向以爲後衛大夫孫甯共逐獻公立孫剽劉歆以爲前年十二月二日宋燕分

襄公十五年八月丁巳朔日有蝕之董仲舒劉向以爲先是晉爲難澤之會諸侯盟又大夫盟後爲溴梁之會諸侯在而大夫獨相與盟君若綴旒不得

舉手

旒旌旗之流隨風動提也顏師古曰爲下所執隨人東西

劉歆以爲五月

二日魯趙分

襄公二十年十月丙辰朔日有蝕之董仲舒以爲陳慶虎慶寅蔽君之明邾庶其有叛心後庶其以漆閭丘未奔陳殺二慶劉歆以爲八月秦周分

襄公二十一年九月庚戌朔日有蝕之董仲舒以爲晉樂盈將犯君後入于曲沃劉歆以爲七月秦晉

分十月庚辰朔日有蝕之董仲舒以爲宿在軫角  
楚大國象也後楚屈氏譖殺公子追舒齊慶封脅  
君亂國劉歆以爲八月秦周分

襄公二十三年二月癸酉朔日有蝕之董仲舒以爲  
後衛侯入陳甯喜弑其君剽劉歆以爲前年十二  
月二日宋燕分

襄公二十四年七月甲子朔日有蝕之旣劉歆以爲  
五月魯趙分八月癸巳朔日有蝕之董仲舒以爲  
比蝕又旣象陽將絕夷狄主上國之象也後六君  
弑楚子果從諸侯伐鄭滅舒鳩魯往朝之卒主中

國伐吳討慶封劉歆以爲六月晉趙分

襄公二十七年十二月乙亥朔日有蝕之董仲舒以爲禮義將大滅絕之象也時吳子好勇使刑人守門蔡侯通於世子之妻莒不早立嗣後閭戕吳子蔡世子般弑其父莒人亦弑君而庶子爭劉向以爲自二十年至此歲八年間日食七作禍亂將重起故天乃見戒也後齊崔杼弑君宋弑世子北燕伯出奔鄭大夫自外入而篡位指略如董仲舒劉歆以爲九月周楚分

昭公七年四月甲辰朔日有蝕之董仲舒劉向以爲

先是楚靈王弑君而立會諸侯執徐子滅賴後陳公子招弑世子楚因而滅之又滅蔡後靈王亦弑死劉歆以爲二月魯衛分傳曰晉侯問於士文伯曰誰將當日食對曰魯衛惡之衛大魯小公曰何故對曰去衛地如魯地於是有災魯實受之其大咎其衛君子魯將上卿是歲八月衛襄公卒十一月魯季孫宿卒晉侯謂士文伯吾所問日蝕從矣可常乎對曰不可六物不同民心不壹事序不類官職不則同始異終胡可常也詩曰或宴宴居息或盡賴事國其異終也如是公曰何謂六物對曰



歲時日月星辰是也公曰何謂辰對曰日月之會  
是謂公曰詩所謂此日而蝕于何不臧何也對曰  
不善政之謂也國無政不用善則自取謫于日月  
之災故其政不可不謹也務三而已一曰擇人二  
曰因民三曰從時此推日蝕之占循變復之要也  
易曰縣象著明莫大於日月是故聖人重之載于  
三經於易在豐之震曰豐其沛日中見昧折其右  
肱亡咎於詩十月之交則著卿士司徒下至趣馬  
師氏咸非其材同於右肱之所折協於三務之所  
擇明小人乘君子陰侵陽之原也

昭公十五年六月丁巳朔日有蝕之劉歆以爲三月

魯衛分

昭公十七年六月甲戌朔日有蝕之董仲舒以爲時  
宿在畢晉國象也晉厲公誅四大夫失衆心以弑  
死後莫敢復責大夫六卿遂相與比周專晉國君  
還事之日比再蝕其事在春秋後故不載於經劉  
歆以爲魯趙分左氏傳季平子曰唯正月朔慝未  
作日有蝕之於是乎天子不舉伐鼓於社諸侯用  
弊於社伐鼓於朝禮也其餘則不太史曰在此月  
也日過分而未至三辰有災百官降物君不舉避

移時樂奏鼓祝用弊史用辭嗇夫馳庶人走此月  
朔之謂也當夏四月是謂孟夏說曰正月謂周六  
月夏四月正陽純乾之月也應謂陰爻也冬至陽  
爻起初故曰復至建巳之月爲純乾亡陰爻而陰  
侵陽爲災重故伐鼓用幣責陰之禮降物素服也  
不舉去樂也避移時避正殿湏時移災復也嗇夫  
掌幣吏庶人其徒役也劉歆以爲六月二日嘗趙分  
昭公二十一年七月壬午朔日有蝕之董仲舒以爲  
周景王老劉子單子專權蔡侯朱驕君臣不說之  
象也後蔡侯果出奔劉子單子立王猛劉歆以爲

五月二日魯趙分

昭公二十二年十二月癸酉朔日有蝕之董仲舒以爲宿在心天子之象也後尹氏立王子朝天王居于狄泉劉歆以爲十一月楚鄭分

昭公二十四年五月乙未朔日有蝕之董仲舒以爲宿在胃魯之象也後昭公爲季氏所逐劉向以爲自十五年至此歲十年間天戒七見人君猶不悟後楚弑戎蠻子晉滅陸渾戎盜殺衛侯兄蔡莒之君出奔吳滅巢公子光殺王僚宋三臣以邑叛其君他如仲舒劉歆以爲二月二日魯趙分是月斗

建辰左氏傳梓慎曰將大水昭子曰旱也日過分而陽猶不克必甚能無旱乎陽不克莫將積聚也是歲秋大雩旱也二至二分日有蝕之不爲災日月之行也春秋分日夜等故同道冬夏至長短極故相遇同道而蝕輕不爲大災水旱而已

昭公三十一年十二月辛亥朔日有蝕之董仲舒以爲宿在心天子之象也時京師微弱後諸侯果相率而城周宋仲幾亡尊天子之心而不棄劉向以爲時吳滅徐而蔡滅沈楚圍蔡吳敗楚入郢昭王走出劉歆以爲十二月二日宋燕分

定公五年三月辛亥朔日有蝕之董仲舒劉向以爲  
後鄭滅許魯陽虎作亂竊寶王大弓季栢子退仲  
尼宋五臣以邑叛劉歆以爲正月二日燕趙分

定公十二年十一月丙寅朔日有蝕之董仲舒劉向  
以爲後晉三大夫以邑叛薛弒其軍楚滅頓胡越  
敗吳衛逐世子劉歆以爲十二月二日楚鄭分

定公十五年八月庚辰朔日有蝕之董仲舒以爲宿  
在柳周室大壞夷狄主諸夏之象也明年中國諸  
侯從楚而圍蔡恐遷于州來晉人執戎蠻子歸于  
楚京師楚也劉向以爲盜殺蔡侯齊陳乞弒其君

而立陽生孔子終不用劉歆以爲六月晉趙分

哀公十四年五月庚申朔日有蝕之在獲麟後劉歆  
以爲三月二日齊衛分

漢高帝三年十月甲戌晦日有蝕之在斗二十度燕  
地也後二年燕王臧荼反誅立盧綰爲燕王後又  
反敗十一月癸卯晦日有蝕之在虛三度齊地也  
後二年齊王韓信徙王明年廢爲列侯又反誅

漢惠帝七年正月辛丑朔日有蝕之在危十三度谷  
永以爲歲首正月朔日是爲三朝尊者惡之五月  
丁卯先晦一日日有蝕之幾盡在七星初劉向以

爲五月微陰始起而犯至陽其占重至八月宮車  
宴駕有呂氏詐置嗣君之害也

漢高后二年六月丙戌晦日有蝕之七年正月己丑  
晦日有蝕之旣在營室九度爲宮室中時高后惡  
之曰此爲我也明年應

漢武帝建元二年二月丙戌朔日有蝕之在奎十四  
度劉向以爲奎爲卑賤婦人後有衛皇后自至微  
興卒有不終之害

漢武帝元狩元年五月乙巳晦日有蝕之在柳六度  
京房易傳推以爲是時日蝕從旁右法曰君失臣



明年丞相公孫弘薨日蝕從旁左者亦君失臣從上者臣失君從下者君失民

漢昭帝元鳳元年七月己亥晦日有蝕之幾盡在張

十二度劉向以爲己亥而旣其占重

孟康曰己土亥木也純陰

故蝕爲最重也

後六年宮車晏駕卒以亡嗣

漢成帝建始三年十二月戊申朔日有蝕之其夜未

央殿中地震谷永對曰日蝕嫫女九度占在皇后

地震蕭牆之內咎在貴妾二者俱發名同事異人

共掩制陽將害繼嗣也亶日蝕則妾不見亶地震

則后不見異日而發則以殊事亡故動變則恐不

知是月后妾當有失節之郵故天因此兩見其變  
若曰違失婦道隔遠正妾妨絕繼嗣者此二人也  
杜欽對亦曰日以戊申食時加未戌土也中宮之  
部其夜殿中地震此必適妾將有爭寵相害而爲  
患者人事失於下變象見於上能應之以德則咎  
異消忽而不戒則禍敗至應之非誠不恪非信不行  
魏文帝黃初二年六月戊辰晦日有蝕之有司奏免  
太尉詔曰災異之作以譴元首而歸過股肱豈禹  
湯罪已之義乎其令百官各虔厥職後有天地青  
勿復劾三公

魏明帝太和初太史令許芝奏日應蝕與太尉於靈  
星祈禳帝曰蓋聞人主政有不德則天懼之以災  
異所以譴告使得自修也故日月薄蝕明治道有  
不當者朕即位以來旣不能光明先帝聖德而施  
化有不合於皇神故上天有以寤之宜勅政自脩  
有以報於神明天之於人猶父之於子未有父欲  
有責其子而可獻盛饌以求免也今外欲遣上公  
與太史令俱禳祠之於義未聞也羣公卿士大夫  
其各勉脩厥職有可以補朕不逮者各封上之

魏少帝正始八年二月庚午朔有日蝕之是時曹爽

專政丁謚鄧騶等轉改法度會有日蝕之變詔羣臣問得失蔣濟上疏曰昔大舜佐治戒在北周周公輔政慎於其朋齊侯問災晏子對以布惠魯君問異臧孫荅以緩役塞變應天乃實人事濟旨譬甚切而君臣不悟終至敗亡

晉惠帝元康九年十一月甲子朔日有蝕之十二月廢皇太子遹爲庶人尋殺之

晉愍帝建興五年五月景子十一月景子並日有蝕之時帝蒙塵于平陽

晉成帝咸和六年三月壬戌朔日有蝕之是時常已

年長每幸司徒第猶出入見王導夫人曹氏如子弟之禮以人君而敬人臣之妻有虧君德之象也  
晉成帝咸和九年十月乙未朔日有蝕之是時既帝  
冠當親萬機而委政大臣者君道有虧也又咸康  
七年二月甲子朔日有蝕之三月杜皇后崩

晉成帝咸康八年正月乙未朔日有蝕之京都大雨  
郡國以聞是謂三朝王者惡之六月而帝崩

晉哀帝隆和元年三月甲寅朔日有蝕之明年而帝  
有疾不親萬機

晉海西公太和三年三月丁巳朔五年七月癸酉朔

並日有蝕之皆海西被廢之應也

晉孝武帝太元四年閏月己酉朔日有蝕之是時符  
堅攻沒襄陽執朱序

晉孝武帝太元二十年三月庚辰朔日有蝕之是時  
至明年帝崩

晉安帝元興二年四月癸巳朔日有蝕之其冬桓玄  
篡位

晉安帝義熙十三年正月甲戌朔日有蝕之明年而  
帝崩

晉恭帝元熙元年十一月丁亥朔日有蝕之自義熙

元年至是日蝕日從上始皆爲革命之徵

日蝕臣僚上災異

漢武帝建始三年十二月戊申朔日有蝕之其夜地震未央宮中詔舉方正直言極諫長安人谷永對策曰災異之發各以象其類日蝕須女之分地震簫牆之內二咎同日俱發厥咎不遠意者陛下志在閨闈不恤政事舉措失中內寵太盛誠留意於正身勉強於力行損宴私之志放淫溺之樂罷娼優之笑絕不享之義循禮而動力行不倦無滯於酒色無逸於游畋未有其身正而臣下邪者也夫

婦之際安危之機也昔舜釐正二妃以崇聖德幽王惑於褒姒而周室淪亡誠脩後宮之政明尊卑之序責不專妬賤者咸進各得其職以廣繼嗣之統息白華之怨後宮親屬勿預政事以遠皇甫之類損女黨之權未有閨門理而天下亂者也

武庫令杜預對曰臣聞日蝕地震陽微陰盛臣者君之陰子者父之陰妻者夫之陰夷狄者中國之陰春秋傳曰日蝕三十六地震五十二或夷狄侵中國或正權在臣下或婦不象夫或臣子背君父事雖不同其類一也臣竊觀人事以考變異則本



朝大臣無不安之人外戚親屬無牟剌之心閔東  
諸侯無彊大之國邊鄙夷狄無逆理之節此殆爲  
後宮以戊申日蝕加未戌未土也中宮之部其夜  
地震未央宮中此必適妾將有爭寵相害而爲患  
者陛下內推至誠深思其變則咎異何足消滅如  
不留聽於庶事奢侈縱欲雖無變社稷之憂也

漢世祖建武七年二月癸亥日有蝕之詔曰陰陽錯  
繆日月薄蝕百姓有過在予一人其赦天下公卿  
百僚各上封事無所諱舉賢良方正各一人於是  
馮衍上書陳事一曰顯文德二曰褒武烈三曰修

舊功四曰招俊傑五曰明好惡六曰簡法令七曰  
差祿秩八曰撫遠境書奏上將召見之後以譔不  
得入是時宰相多以功舉官人率由舊恩天子勤  
吏治俗頗苛刻因是變也太中大夫鄭興上疏曰  
臣聞國無政不用善則取譴于日月之災故政不  
可不慎也其道務三而已一曰擇人二曰困民三  
曰從時此應變之要也昔在帝堯洪水滔天帝在  
俾入岳曰鯀哉帝知鯀不可用然猶屈已之是從  
岳之非重建衆也昔齊桓公避亂於莒鮑叔從之  
既反國鮑叔舉管仲桓公從之遂立九合之功晉

文公奔翟從者五人既得晉國將謀六師趙襄以  
郊穀爲閒禮樂敦詩書使將中軍而五子下之故  
伏彊楚於城濮內天子於王城令衮職有闕朝論  
輒議功臣用則鮑趙之舉息矣願陛下上師陶唐下  
覽齊晉以成屈已從衆之德以濟羣臣舉善之美  
臣聞上竭聰明則下懼其罪者臣象也君威无急  
則臣道促迫願陛下留神寬恕以崇柔克之德不  
從

漢孝明帝永平三年八月壬申日有蝕之是時刑法  
嚴峻人懷憂懼因是變也鍾離意上疏曰陛下躬

行道德修明經術敬畏天地憂恤黎元勞心不息  
然而天氣未和日月不明水泉湧溢漂殺人民咎  
在羣臣不能宣化理職人懷恐急故百官不親吏  
民不和至於骨肉相殘以逆和氣雖加殺罰猶不  
能止故百姓可以德勝不可以刑服願陛下緩刑  
罰順時氣以調陰陽垂之無極上雖不能用然知  
其忠直故不得久留中出爲魯國相爲治存大體  
不求細過百姓愛之

唐憲宗元和三年七月癸巳日蝕憲宗謂宰相曰昨  
司天奏太陽虧蝕當如何也又素服敕日其義安

在李吉甫對曰日月運行遲速不齊日凡周天三百六十五度餘日行一度月行十三度有餘率之二十九日半而與日會又月行南北同道即日與月之所奄故名薄蝕雖自然常数可以推步然日爲陽精人君之象若君行有緩有急即日爲之遲速稍踰常度爲月所奄即陰侵於陽亦猶人君行或失中應感所致故禮云男教不脩陽事不得譎見于天日爲之蝕古者日蝕則天子素服而修六宮之職月蝕則后素服而修六宮之職皆所以懼天威而自省惕也人君在物之上易爲驕盈故聖

人制禮務虔恭夕惕以奉若天道苟德大備渾天  
合人百福斯臻陛下恭已嚮明日慎一日又顧憂  
天譴則聖德益固昇平何遠伏望長保睿志以求  
無彊之休上曰天人交感妖祥應德蓋如卿言素  
服敕日自貶之旨也朕雖不德敢不兢惕卿等當  
輔吾不逮也

卷五

乾象通鑑卷第六

河間府免解進士臣李李奉

聖旨編

陰微前論

太陰總序

月行

月行九道

月行三門

月旁瑞氣

月無光并異氣

月朏胸并盈縮附

月弦望

月變色并異氣

月晝明

兩月並明

星入月中



白暈貫月

月生齒

白虹貫月

月暈

月生刺

月生足

月珥背璫

音璫

太陰總序

傳曰月爲太陰之精以之配月女主之象以之比德  
刑罰之義列之朝廷諸侯大臣之類故君明則月  
行依度臣執權則月行失道大臣用事兵刑失理  
則月行乍南乍北女主外戚擅權則或進或退月  
變色將殃月晝明姦邪並作君臣爭明女主失行

陰國兵彊中國饑天下謀僭數月重見國以亂亡

月行

隋書曰月者陰之精也其形圓其質清日光照之則見其明日光所不照則謂之魄故月望之日日月相望人居其間盡覩其明故形圓也二弦之日日照其側人觀其旁故半明半魄也晦朔之日日照其表人在其裏故不見也其形有遲疾其極遲則日行十二度彊極疾則日行十四度半彊遲漸疾疾極漸遲二十七日半彊而遲疾一終矣又月行之道科帶黃道十三日有奇在黃道表又十三

日有奇在黃道裏表裏極遠者去黃道六度二十七日有奇陰陽一終

張衡云對日之衝其大如日日光不照謂之闇虛逢月則月蝕值星則星亡今歷家月望行黃道值闇虛有表裏淺深故食有南北多少

天文總論曰月者太陰之精積而成象魄質含影裏日光以照之當日蝕猶臣僭君道而禍至月虧猶陰道臣道妻道不可使盈理當常闕其行速臣下之道行有弦望晦朔日逢疾陰陽刑政之等又陰陽二道從合朔後月出日道外卽行陽道經十三

日半又却入日道內越黃道行陰道從陽道卽多風行陰道卽多雨

河圖遺書曰月行失道是謂陰忒其國人臣犯上女主侵權終以事敗亦曰陰謀不成

陳卓叙占曰月逆行陰道則后妃失寵亦曰宮中多爭月逆行陰道則女主擅權外戚專恣干時政連家坐罪

京房外傳曰月逆行失道不循常則國多陰憂行疾則其殃速行遲則禍緩

凡月行則以晦朔決之日冬則南夏則北冬至於斗

夏至於東井日之所行爲中道月五星皆隨之也  
箕星爲風東北之星也東北地事天位也故易曰  
東北喪朋及巽在東南爲風風陽中之陰大臣之  
象也其星軫也月去中道移而東北入箕若東南  
入軫則多風西方爲雨雨少陰之位也月失中道  
移而西入畢則多雨故詩云月離于畢俾滂沱矣  
言多雨也星傳曰月入畢則將相有以家犯罪者  
言陰盛也書曰星有好風星有好雨月之從星則  
以風雨言失中道而東西也故星傳曰月南入牽  
牛南戒民間疾疫月北入太微中坐則下人謀上

人一曰月爲風雨日爲寒溫冬至日南極晷長南  
不極則溫爲害夏至日北極晷短北不極則寒爲  
害故書曰日月之行則有冬夏也政治變於下日  
月運於上矣月出房北爲雨爲陰爲亂爲兵出房  
南爲喪大水旱至衡而應及五星之變必然之效也

### 月行九道

天文總論曰月春行青道二出黃道東夏行赤道二  
出黃道南秋行白道二出黃道西冬行黑道二出  
黃道北經曰明王在上則月行依九道若主不明  
臣奪勢則月多失道行而進退大臣奪權兵刑失

理臣下用事則出南出北女主外戚專權則或進或退若月行疾則君刑緩月行遲則君刑急故曰月變省刑書曰青災肆赦此之謂也

漢志言月有九行者黑道二出黃道北赤道二出黃道南白道二出黃道西青道二出黃道東立春春分月東從青道立秋秋分西從白道立冬冬至從黑道立夏夏至南從赤道然用之一決房中道青赤出陽道白黑出陰道若月失節度而妄行出陽道則旱出陰道則雨

月行三門

天文總論曰天有三門猶房之四表房中央曰天街  
天之道也天門也黃道之所經也南間曰陽間陽  
環之南三尺曰陽裏陽裏之南三尺曰太陽中道  
北間曰陰間陰環之北三尺曰陰裏陰裏之北三  
尺曰太陰中道故順道天下和平由陽道則主喪  
由乎陰道則主水

河圖帝覽嬉曰月以中道是謂安寧天下和平舉兵  
不言領被其刑逆天之道辱以無名

班固天文志曰月失節度而行出陽道則旱風出陰  
則陰雨



京房易祗音妖占曰月行南道爲旱月行北道爲水月  
行中道天門之間則天下大安五穀豐登人主益  
壽

月旁瑞氣

月揚光者易萌氣樞曰臣道循理上奉於君則月揚  
其光

月出盛明者高宗占曰君治以道臣下從化則月出  
盛明

月上有黃芒者夏氏占曰君道福昌后妃有喜則月  
有黃芒

月有暈珥者河圖帝覽嬉曰五穀豐登歲序平康則  
月有暈珥

月有戴氣者荊州占曰月戴氣不出百日人主有喜  
月終歲不暈者荊州占曰月終歲不暈主天下偃兵  
鄰國求和也

月有兩珥者河圖帝覽嬉曰月有兩珥其下國喜兵  
在外勝

月有四珥高宗占曰主其下國安君嬉

月圓而暈者禮斗威儀曰君乘土德而王其政太平  
則月圓而多暈

月赤而明者符瑞圖曰君乘火德而王其政頌平則  
月赤而明

月白而明者符瑞圖曰君乘金德而王其政頌平則  
月白而明

月青而明者符瑞圖曰君乘木德而王其政頌平則  
月青而明

正月有偃月者京房易飛候曰其下國有喜則正月  
有偃月

瑤光貫月者河圖著命曰瑤光如蜺貫月意感女樞  
於宮而生顓帝

白氣貫月者河圖著命曰扶都見白氣貫月意感而生湯

月精明者符瑞圖曰月爲陰精在臣道若君臣和同則月精明

月大光者京房易傳曰天下和平上下俱昌則月大光月無光并異氣

京房祿異占曰月無光臣下作亂教令不行民饑荊州占曰月生而無光其下有死亡

天文總論曰月暈無精光是爲天盪其下有兵喪王者以德令除之則無咎

河圖帝覽嬉曰月始出時有雲居其中似禽獸狀名  
曰綦婁甲乙日見東方受其害丙丁日見南方受  
其害戊己日見中央受其害庚辛日見西方受其  
害壬癸日見北方受其害又曰月大而無光其城  
不降月小而無光其城降

荊州占曰月下有人相隨者是謂惡成其下國  
分侯王坐之又曰月中如人行者有兩主爭客勝  
又曰有赤雲黑曰交臨月當其國有亡軍

河圖帝覽嬉曰月旁有白雲大如扞抵月者期六十  
日外有戰破軍死將若月旁多赤雲如人頭大戰

多白爲兵多黑爲雨又曰月旁有白雲一黑雲二其大如厚布抵貫月圍城拔邑

高宗占曰青雲刺月是謂賊害主受其殃黃雲刺月女主有憂白雲刺月其下君亡黑雲刺月陰雨踰時

陳卓叙占曰赤雲奄月往來摩月則其下血流亦曰破軍殺將青雲奄月往來相摩則其國饑人相食赤地千里白雲奄月往來相摩則其野大戰流血白骨籍籍黃雲奄月往來摩月不佳其國有姦邪害良善黑雲奄月往來摩月其國大傷水禾稼亦

曰有疾疫

月朏朏 盈縮附

劉向洪範傳曰晦而月見西方謂之朏音朔而月見西方謂之仄匿朏則王侯其舒言政緩則陽行遲陰行疾也仄匿則王侯其肅言政急則陽行疾陰行遲也舒者臣驕而執政肅者臣下恐懼而太甚劉歆曰舒者王侯展意專事臣下促急故曰行疾也肅者王侯縮胸音翊不任事臣下弛縱故月行遲荆州占曰月行疾有急事月過度者姦起月行不及度者多留事

易萌氣樞曰月當滿不滿君侵臣君侵臣則有大旱  
之災月當毀不毀臣陵君臣陵君則有兵水之難  
月大盈則人君憂太縮則臣下害

古今星釋曰月當盈不盈臣道盛強其野有兵喪亦  
曰臣下擅主柄月當縮不縮君臣勢敵其野有女  
喪亦曰君臣不同道臣下有離心

河圖遺書曰月當盈而行疾是謂太盈太盈則天子  
有憂月當縮而行遲是謂太縮太縮則女主當之  
亦曰臣下受禍

晉安帝義熙九年十二月辛卯朔日月猶見東方謂



之仄匿則王侯其肅時劉裕輔政威刑自己仄匿之應

月弦望 皆晦附

天文錄曰月生六日而弦大臣爲政不用主命月生七日而弦主人勝客不勝月未當弦而弦是謂起兵月當弦而不弦國有大兵

荊州占曰月生八日而弦天下大安月生八日而不弦攻人城者不勝

河圖帝覽嬉曰月生十日而不弦以戰不勝主將死當其弦而弦者是謂大安當其弦而不弦是謂不安

荊州占曰月十四日而望者主更令期一年以月行

十六日而望者主不昌

古今注月月不當十四日十六日而望而望者是也

與未當望而望者同

河圖帝覽嬉日月未當望而望是謂促兵必攻人地者大昌月當望而不望以攻人地者有殃所宿國其下亡地

荊州占曰月入五日而昏者月內有急兵糴貴又曰大月八日昏中小月七日昏中過度者有兵事不及度者有憂月下弦而不弦者陸多姦月當盡而不盡者所宿國亡

京房對災異曰人君好用邪佞朝無忠臣則月失行  
李淳風曰月未當缺而缺女主憂大臣黜月當出而  
不出有陰謀其下國亂月未當上弦而上弦其下  
國有兵月未當下弦而下弦其下國有姦臣月初  
出而盛明女主持政月上弦後盛明君無盛德月  
前望西缺後望東缺名曰反月其下臣不奉法侵  
奪主勢無救則爲涌水兵起其衝其救也正刑罰  
誅姦猾任賢能則月變而不爲傷月當晦而不盡  
者所宿國亡地月有異氣色者皆爲后妃有謀  
天文總論曰月至十六十七日不虧者陰盛臣彊月

生三日合見如至七日見者天下有兵十五日而後見者國亡望而不滿者其下分地月生三日至七日而盈者兵起八日已後盈者兵亂十一日至十四日盈者其分有喪月望而月中蟾蜍不見者所宿國大水城陷民流一爲女主宮中不安

月變色并異狀

天文總論曰月若色青爲憂爲饑赤爲兵爲旱黃爲喜爲德黑爲水爲病皆以其宿國占之月毀爲兩段將相有謀毀三段四段者天下亂月始生而復沒者天下大亂月角各有一星有軍在外者賊至

月分爲兩段者無道之君失天下月墜于地者大臣亡國憂月始生而半者女主彊月始生而見東方者天下交兵月始生而見南方者米賤下大者下旬米賤月赤如赭大將戰死于野月始生而偃天下有兵兵罷無兵兵出日月並相去二寸者臣下有亂月中見日者其下國亡

大象旁通占曰月有四角乍東乍西乍南乍北數動不停者其國大兵起弑君篡奪月有兩角色赤若火焰不定者其野有臣脅主擅君柄月有一角色黑黃者其野有死君

月晝明

天文總論日月爲臣日爲君臣以明續君月晝明者  
臣下專權姦邪並作擅君之政續君之明陰國兵  
彊中國饑天下謀僭李淳風曰其救也退彊臣斷  
邪佞進中直親賢良則月得其行不專明也

河圖遺書曰月待日爲明者也日麗乎晝月麗乎夜月  
晝明則君不專明臣下專恣擅天子權亦曰禮樂  
征伐不自天子出

陳卓叙占曰月晝明則君不能制臣姦邪並作傷君  
之德掩君之明也一曰有自立諸侯一曰夷狄入

侵中國亦曰陰國兵強中國衰弱也

海上通占曰月晝明映日無光是謂陽微陽道微君道虧則臣下擅主權禮樂征伐不自天子出

梁簡公帝大寶元年正月丙寅月晝光占曰有隱謀明年八月侯景篡位

兩月並明

天文總論曰兩月並見者其下兵起國亂地陷水湧亡國之兆數月並見者其下異姓大臣爭權

天文別錄曰兩月齊見其野有篡弑之臣亦曰彊臣脅主人君失位

陳卓叙占曰兩月並見者其下大兵起國將棄祀亦  
曰君不勝臣

天文別錄曰兩月並見則臣弑君亦曰女主彊干天  
子政是陰乘干陽陽不勝陰之象也人臣女主皆  
陰類也

大象旁通占曰兩月見有角相抵若闔則天下大亂  
小大相陵弱相吞噬

漢成帝建始元年八月戊午晨漏未盡三刻有兩月  
並見京房傳曰婦人厲月幾望君子征凶言君弱  
而婦強爲陰所乘則月並出後趙飛燕爲亂殺戮



皇太子終致敗亡

梁武帝太清二年正月朔兩月見西方相承如鉤占曰其國亂是時帝爲侯景所出崩後乃篡位

隋煬帝大業九年正月二十七日旦東方二月並見去二尺許在箕斗之間俄而楊玄感以黎陽叛自此兵賊相繼至於滅亡

星入月中

天文總論曰星入月中者其下有兵喪亡國破軍殺將陳卓叙占曰占星入月而現月中爲星蝕月月蝕星而星滅爲月蝕星又曰五星入月也其野有逐將相

古今星釋曰歲星入月中星見則歲不登人相食枯  
骨籍籍赤地千里星滅則殃輕熒惑入月中星見  
則女主擅權外戚干政星滅則禍淺太白入月中  
星見則有大功役勞民天下胥怨國將棄祀星滅  
則殃輕辰星入月中星見則天下大水傷禾稼米  
貴民饑亦曰災疫星滅則災淺

晉惠帝太安二年十一月庚辰歲星入月中占曰國  
有逐相

晉元帝太興三年三月己未太白入月在斗郭璞曰  
月屬坎陰府法象也太白金行而來犯之天意若

車馬通鑑卷之十一  
曰刑理失自中國

晉成帝咸康元年二月乙未太白入月占曰人君死  
又爲兵人主惡之明年石季龍之衆大寇江南於  
是內外戒嚴

晉孝武太元十二年二月戊寅熒惑入月占曰有亂  
臣若相戮者一曰女親爲政天下亂是時瑯琊王  
輔政王妃從兄王國寶以姻昵受寵又陳郡人袁  
悅昧私荀進交結主相扇搖朋黨十三年帝殺悅  
於市於是入月在危占曰賊人欲殺主不出三年  
必有內惡是後慕容垂翟遼姚萇苻登慕容永至

阻兵爭強十八年正月乙酉熒惑入月占曰憂在  
宮中非賊乃盜也一曰有亂臣若有戮者二十九  
年九月帝崩暴內殿兆庶宣言夫人張氏潛行大  
逆又王國寶狡邪卒伏其辜

隋高祖仁壽四年六月庚午有星入月中數日而退  
占曰有大兵喪亡國破軍殺將是年七月帝被殺  
而崩後漢王諒據并州叛遣楊素討平

### 白暈貫月

晉書曰白暈貫月其下有廢主王者惡之

古今星釋曰白暈貫月中其野有死君亦曰國祚將亡

大象旁通曰白暈貫月中其野有黑氣來往出沒者  
天下大亂國君當之若白暈正東不周者期一年  
有兵喪正南不周期一年有疾疫正西不周者期  
一年大饑荒正北不周者一年大水災  
晉海西公太和四年閏月乙亥有白暈貫月占曰王  
者惡之六年相溫廢帝

月生齒

晉書曰月生齒天子有賊臣羣下自相殘害

陳卓叙占曰月生齒則天子有憂賊臣受害禍亦曰

臣下作亂

河圖遺書曰月初生生蔭則臣下有陰謀月上弦生蔭則天下兵亂月下弦生蔭則人臣篡弑奪人君位中月望生蔭則女主擅柄外戚逼人君天下以兵相誅也

晉安帝隆安五年三月甲子月生蔭至五年十一月平後魏天興四年三月甲子月生蔭至五年十一月平原太守劉曜聚衆爲盜遣將誅之

白虹貫月

武密曰白虹貫月大兵將起軍戰于野

陳卓叙占曰白虹貫月上下若植則其國棄祀白虹

橫貫月側臣下起兵入弑天子亦曰有內亂

後魏孝靜天平三年十月丁酉白虹貫月占爲不臣  
至四年十二月河間邢磨納范陽盧仲禮等聚衆  
亂齊獻武討平之

後周天和五年正月乙巳月在氐有白虹長數丈而  
貫之占曰兵起大戰是時齊將斛律明月寇邊於  
北三月己酉憲自龍門渡河攻拔其新築五城兵  
起大戰

### 月暈

巫咸曰月暈者臣下專權之象受衝所在之國不安

李淳風曰終歲不暈天下和平

河圖帝覽嬉日月暈再重九日風起月暈三重天下  
受兵月暈四重其下亡國月暈五重女主有憂月  
暈六重其國失政月暈七重其下易主月暈八重  
其下亡國月暈九重其下兵起流血亡地月暈十  
重天下更主

荊州占曰孟月七日仲月八日季月九日皆當有暈  
若不暈出三日必有暴風雨

京房易傳曰正月三暈者民好鬪下有死亡歲大惡  
河圖帝覽嬉曰五月中月有一暈已上者道上有執



死將

荊州占曰正月八日九日十六日十八日夜月有暈  
者三月有德令十一日暈者大旱二十五日暈  
者飛蝗多死二十三日二十四日暈者五穀不成  
二十五日二十六日暈者文功廢棄音洗麻有子也絲貴  
荊州占曰一月五暈至九暈者天下有亡地有至十  
暈者天下更政

高宗占曰月有交暈赤光其國不出二年遇兵又曰  
月暈多白氣從外入攻城拔得大將又曰月暈  
再重背在外者私成從外背在內者私成於內文

曰月暈不合外有四背璫外有謀不成

荊州占曰月暈如連環有白虹於外不及月者女貴  
人有陰謀又曰月暈有雲橫貫之起兵者勝

荊州占曰月暈三重赤雲貫之其下國亡又曰月暈  
有光主起兵降又曰正月甲乙日暈者民多疾病  
丙丁日暈者旱金貴戊己日暈者歲豐庚辛日暈  
者有赦壬癸日暈者多水

李淳風曰月暈而冠者天子喜

武密曰軍在外月暈者其將戰勝一曰先起兵者勝

月生刺

春秋運斗樞曰月垂芒刺國昏亂憂在公其地弱月

八日生刺是謂割地有民分月九日生刺其地饑

民以食弱世以兵行月以十日生刺女子執政月

以十一日生刺其地有以陰死者月以十三日生

刺是爲始彊得地月以十四日生刺是謂不和其

下文傷月以十五日生刺是謂盛強地多兵月以

十六日生刺是謂內弱臣叛其主月以十七日生

刺是謂威法主有流兵月以十八日生刺是謂溫

死月以十九日生刺是謂陽衰陰治女子執政月

以二十日生刺是謂地有土切月以二十一日生

刺是謂千里外聚兵下有土功月以二十二日生  
刺是謂始衰貴人多死月以二十三日生刺是謂  
亂源月以二十四日生刺是謂陰盛女子爲主月  
以二十五日生刺是謂隱弊是謂伏殃月以二十  
六日生刺是謂多憂以二十七日生刺是謂大饑  
月以二十八日生刺是謂竟城月以二十九日生  
刺是謂內亂是謂自伐

月生足

維書維罪級曰陪臣之命王公望風反謀時合羣下  
並附諸侯歸心則月舉足垂爪

河圖祕微篇帝失德政不平則月生足

春秋緯曰月赤足臣有過后族擅權

月生足者下有芒足

考異卹曰諸侯謀叛則月生爪

荊州占曰月生爪其下軍憂又曰月爪所指四方煩  
苦有土功事

古今星釋曰月生足人君失德則諸侯叛爭亦曰女  
主失寵

大象旁通曰月下生爪則天子有憂亦曰諸侯有陰  
謀

月珥背璫

音瓊

河圖帝覽嬉曰月暈而珥期六十日兵起若不暈而珥色青有憂色赤有兵色黃有喜色白有喪色黑失國皆以三年也

高宗占曰月有兩珥十日有雨三珥國喜四珥女主憂不則人主立諸侯

荊州占曰月昏而珥者有半喜夜半而珥者邊地有恐又曰月珥者有半且戴不出百日主有喜

李淳風曰月外有抱珥在暈月外赤者外人勝

武夜曰月珥其下城降

河圖帝覽嬉曰月不暈而有四珥者臣下有謀不成

精符曰月生背璫者臣下池縱欲相殘賊不和之

氣天子宜備左右

荊州占日月有四提天子無后其國憂

乾象通鑑卷之六